

Во Пятница 7-й седмицы по Пасхе

Поем последование все праздника неизменно, якоже и в господственный день вознесения, кроме чтений, и полиелеа: на вечерни же, и в пяток на Утрени, и на Литургии блаженна праздника, песнь 9-я обоих канонов, на 8. По входе тропарь. Слава, и ныне: кондак. Прокимен, аллилуиа, и причастен праздника: апостол же и евангелие дне.

Службу же миней поем на повечерии.

НА ЛИТУРГИИ,

Блаженна праздника, песнь 9-я обоих канонов, на 8.

Тебе Избавителя мира Христа Бога, апостоли видяще Божественно возвышаема, со страхом играюще величаху.

Твою обожившуюся плоть зряще Христе, на высоте ангели, друг ко другу глаголаху: воистинну Сей есть Бог наш.

Тебе безплотных чинове Христе Боже, на облацех вземлема видяще, взываху: славы Царю врата возмите.

Тебе сопедшаго даже до последних земли, и человека спасшаго, и восхождением Твоим возвысившаго, Сего величаем.

О даров паче постижения! О таинства страшнаго! Всеми бо владычествуяй, от земли отходя к небесным, учеником посла Духа Святаго, просветившаго сих смысл, и огненны сотворившаго благодатию.

Полцы ученичестии, Господь рече, вы сидите во Иерусалиме: и Аз низпослю вам Утешителя другаго, Отцу сопрестольна и Мне равночестна, Егоже видите взимаема, и облаком светлым носима.

Слава: **Взятся** яве великолепие выше небес, плотию обнищавшаго, и соседением Отца почтесе естество наше отпадшее: торжествуим, и согласно вси воскликнем, восплещим руками радующеся.

И ныне: Богородичен: **Свет** от Света возсиявый Всенепорочная, из Тебе возсия, и черноть безбожия всю разруши, и в нощи спящих просвети. Сего ради вси по долгу Тя во веки присно ублажаем.

По входе тропарь праздника, глас 4-й:

Вознеслся еси во славе Христе Боже наш, * радость сотворивый учеником * обетованием Святаго Духа, * извещенным им бывшим благословением, * яко Ты еси Сын Божий, Избавитель мира.

. Слава, и ныне: кондак праздника, глас 6-й:

Еже о нас исполнив смотрение, * и яже на земли соединив Небесным, * Вознесся еси во славе Христе Боже наш, * никакоже отлучаяся, но пребывая неотступный, * и вопия любящим Тя: * Аз есмь с вами, и никтоже на вы.

Прокимен, глас 7: Вознесися на небеса Боже, и по всей земли слава Твоя.

Стих: Готово сердце мое Боже, готово сердце мое: воспою и пою во славе моей.

Апостол в деяниях, зачало 50: (Деян. 27:1 - 43)

Во дни оны, якоже суждено бысть отплыти нам во Италию, предаху Павла же и иныя некия юзники сотнику, именем Иулию, сперы Севастийския. Вшедше же в корабль Адрамитский, восхотевше плыти во Асийская места, отвезохомся, сущу с нами Аристарху Македонянину от Солуня. В другой же пристахом в Сидоне: человеколюбие же Иулий Павлови дея, повеле к другому шедшу прилежание улучити. И оттуду отвезшеся приплыхом в Кипр, зане ветри бяху противни: пучину же, яже противу Киликии и Памфилии, преплывше, приидохом в Миры Ликийския. И тамо обрет сотник корабль Александрийский пловущь во Италию, всади ны в онь. Во мнози же дни косо плавающе и едва бывше противу Книда, не оставляющу нас ветру, приплыхом под Крит при Салмоне. Едва же избирающе край, приидохом на место некое, нарицаемое Доброе Пристанище, емуже близ бе град Ласей. Многу же времени минувшу и сущу уже небезбедну плаванию, занеже и пост уже бе прешел, советоваше Павел, глаголя им: мужие, вижду, яко с досаждением и многою тцетою не токмо бремене и корабля, но и душ наших хошет быти плавание. Сотник же кормчия и навклира послушаше паче, нежели Павлом глаголемых. Не добру же пристанищу сущу ко озимению, мнози совет даяху отвезтися оттуду, аще како возмогут, достигше Финикии, озимети в пристанищи Критстем, зрящем к ливу и к хору. Дхнувшу же югу, мневше волю свою улучити, воздвигше ветрила, плыху вскрай Крита. Не по мнозе же возвев противен ему ветер бурен, нарицаемый евроклидон. Восхищену же бывшу кораблю и не могущу сопротивитися ветру, вдавшеся волнам носими бехом. Остров же некий мимотекше, нарицающься Клавдий, едва возмогохом удержати ладью, юже востягше, всяким образом помогаху, подтверждающе корабль, боящеся же, да не в сирть впадут, низпустивше парус, сице носими беху. Вельми же обуреваемым нам, на утрие изметание творяху, и в третий день своими руками ядрило корабленное извергохом. Ни солнцу же, ни звездам явльшымся на мнози дни, и зиме не мале належащей, прочее отимашеся надежда вся, еже спастися нам. Многу же неядению сущу, тогда став Павел посреде их, рече: подобаше убо, о, мужие, послушавше мене, не отвезтися от Крита и избыти досаждения сего и тцеты. И се ныне молю вы благодушствовати, погибель бо ни единой души от вас будет, разве корабля. Предста бо ми в сию ноць Ангел Бога, Егоже аз есмь,

Ему же и служу, глаголя: не бойся, Павле, кесарю ти подобает предстати, и се, дарова тебе Бог вся плавающыя с тобою. Тем же дерзайте, мужие, верую бо Богови, яко тако будет, им же образом речено ми бысть: во остров же некий подобает нам пристати. И егда четвертаянадесятъ нощъ бысть, носимым нам во Адриатстей пучине, в полунощи непщеваху корабленицы, яко приближаются к некоей стране, и измеривше глубину обретоша сажений двадесять. Мало же прешедше и паки измеривше, обретоша сажений пятнадцать. Боящеся же, да не како в прудная места впадут, от носа корабля вергше котвы четыре, моляхомся, да день будет. Кораблеником же ищущым бежати из корабля и низвесившым ладю в море, изветом аки от носа хотящим котвы простерти, рече Павел сотнику и воином: аще не сии пребудут в корабли, вы спаситися не можете. Тогда воины отрезаша узя ладии и оставиша ю отпасти. Егда же хотяше день быти, моляше Павел всех, да примут пищу, глаголя: четыренадесятый днесь день ждуще, не ядше пребываете, ничтоже вкусивше. Тем же молю вас прияти пищу, се бо к вашему спасению есть, ни единому бо от вас влас главы отпадет. Рек же сия и приемъ хлебъ, благодари Бога пред всеми и преломль начат ясти. Благонадежни же бывше вси, и тии прияха пищу. Бе же в корабли всех душ двесте семьдесят и шесть. Насыщшеся же брашна, облегчиша корабль, изметающе пшеницу в море. Егда же день бысть, земли не познаваху, недро же некое усмотреша имущее песок, в неже, аще мощно есть, совещаша извлечь корабль. И котвы собравше, везяхуся по морю, и купно ослабивше узя кормилом, и воздвигше малое ветрило к дышущему ветрецу, везохомся на край. Впадше же в место ископное, увязиша корабль, и нос убо увязший пребысть недвижимъ, кормило же разбивашеся от нужды волн. Воином же совет бысть, да узники убьют, да не кто поплыв избегнет. Сотник же, хотя соблюсти Павла, возбрани совету их, повеле же могущым плавати, да изскочивше первее изыдут на край, а прочии, ови убо на дщицах, ови же на нечем от корабля. И тако бысть всем спаситися на землю.

Аллилуиа, глас 2-й: Взыде Бог в воскликновении, Господь во гласе трубне.

Стих: Вси языцы восплещите руками, воскликните Богу гласом радования.

Евангелие Иоана, зачало 57 (Ин. 17:18 - 26)

Во время оно, возвед Иисус очи Свои на небо, и рече: якоже Ты Мя, Отче, послал еси в мир, и Аз послах их в мир, и за них Аз свящу Себе, да и тии будут священи во истину. Не о сих же молю токмо, но и о верующих словесе их ради в Мя, да вси едино будут, якоже Ты, Отче, во Мне, и Аз в Тебе, да и тии в Нас едино будут, да и мир веру имет, яко Ты Мя послал еси. И Аз славу, юже дал еси Мне, дах им, да будут едино, якоже Мы едино есма. Аз в них, и Ты во Мне, да будут совершени во едино, и да разумеет мир, яко Ты Мя послал еси и

возлюбил еси их, якоже Мене возлюбил еси. Отче, ихже дал еси Мне, хочу, да идеже есмь Аз, и тии будут со Мною, да видят славу Мою, юже дал еси Мне, яко возлюбил Мя еси прежде сложения мира. Отче праведный, и мир Тебе не позна, Аз же Тя познах, и сии познаша, яко Ты Мя послал еси. И сказах им имя Твое, и скажу, да любы, еюже Мя еси возлюбил, в них будет, и Аз в них.

За Достойно, поем и до отдания ирмос:

Величай душе моя, Вознесагося от земли на небо, Христа Жизнодавца.

Ирмос: Тя паче ума и словесе Матерь Божию, в лето Безлетнаго неизреченно рождшую вернии единомудренно величаем.

Причастный: Взыде Бог в воскликновении, Господь во гласе трубне.

Аллилуиа [трижды]